

**Regional News Unit AIR Aizawl
Monday, January 27, 2025
Time - 7:30 -7:40Hrs**

REGIONAL NEWS BULLETIN

HEADLINES (MORNING)

- **Larsap General Vijay Kumar Singh an a sorkar chuan 'Bana Kaih' ruahmanna hmangin Mizoram hi nasa taka chawikan a tum a ni a ti.**
- **Thla thar February ni 12 a VC/LC inthlan lo awm tur atana hming pe lut te inhnuhdawh hun vawiin thleng hawn a ni.**
- **United States Agency for International Development (USAID) chuan Bangladesh-a chhawmdawlina a pek zawng zawng a titawp.**
- **Nizana Australian Open mipa final-ah World Number 1 Jannik Sinner a champion.**

<><><>

R-DAY: AIZAWL

Larsap General Vijay Kumar Singh an a sorkar chuan 'Bana Kaih' ruahmanna hmangin Mizoram hi nasa taka chawikan a tum a ni a ti.

Aizawl lammuala nimina Republic Day lawmnaah thu sawiin larsap chuan mahni kutkawiha eizawngtute leh kuthnathawktute puih na'n leh Mizoram ei leh bar dinhmun chawisan leh intodelh na'n "Mizoram Bana Kaih (Hand holding) Scheme" chu nikum September thla khan tlangzarh a nia . He hmalakna hi Viksit Bharat 2047 leh United Nations Sustainable Development Goals (SDGs) hlenchhuah theih nana tangkai tak a ni tel dawn a ni a ti.

General VK Singh chuan 'Bana kaih' ruahmanna hnuaiia thuang pakhat - Chief Minister's Special Category Scheme hnuaiiah sum hlawm a puih a cheng nuai khat thleng pek theih a nih bawk dawn thu a sawi a. Bana-kaih ruahmanna hnuaiiah hian sorkar chuan thlai chi li - Sawhthing, Hmunphiah, Aieng leh Mizo Hmarchha tan Minimum Support Price (MSP) a siam a. Hemi awmzia chu Sorkar in rate a siam ai a a hralhna tur man zat a hniam zawk chuan sorkar in kuthnathawktute hnen atangin heng thlai te hi a lei sak dawn a ni, a ti.

Larsap chuan Mizoram chu state ralmuang tak a la ni thei zel niin a sawi a. Hmun thenkhatah harsatna tlem lo awm thin mahse venhimna hna thawktu Mizoram Police te'n uluk taka an vil thin avangin boruak muanawm tak a la awm thei reng a, a lawmawm hle a ni a ti. State leh state inkar ramri ah pawh ngawrh takin venhim hna thawh a nih avangin ral a muang tih a sawi a.

Assam nen a ramri chungchanga inbiakna pawhin hma a sawn zel niin a sawi. Dan phalloh thil lakluh tlem ramri a buaina dang chhuak thei ven kawngah hna an thawk tha hle niin a sawi bawk a. Nikum chung khan kuhva tawlhruk Kg nuai 12, sing 5, sang 8 leh 493 manin, hemi kaihhawih ah hian Mizoram Police chuan mi 173 an man a ni, a ti. He'ng bakah hian sialai leh puaktheithil dang leh ruihhlo thahnem tak an man thu a sawi bawk.

Ruihhlo do hna theihtawp chhuah thin niin, Mizoram Police leh Excise & Narcotics te ngawrh taka an thawh zarah nikum chung khan mi 4,568 man niin thubuai 4,619 ziah luh ni a. Chak zawka ruihhlo do hna thawh theih na'n Kohhran leh tlawmgai pawl hrang hrangte thawhpui zui zel turin a sawm nghal bawk a ni.

Larsap chuan National Education Policy 2020-in a phut angin State Sawrkar hnuai a University dinna tur hmalakna kalpui mek zel a ni, a ti a. Higher & Technical Education department pawhin Mizoram State University a rang thei ang bera neih theih na'n chak takin ruahmanna an kalpui mek bawk a ni, a ti a ni.



MEDALS

Nimin Aizawla Republic Day lawmna-ah Police, Excise & Narcotics leh Fire & Emergency Services hnathawk tha leh khawpui fai intihsiakna lawmman leh chawimawina hrang hrang-te larsap Gen. Vijay Kumar Singha'n a hlan. President's Medal for Distinguished Service chu Pu Zoramsanga Ralte, MPS hnenah hlan a ni a, Medal for Meritorious Service chu Pu Kaste Romalsawma, MPS leh Inspector Vanlalhluna hnenah hlan a ni. Mi 11 hnenah Governor's Gold Medal hlan a ni a, mi 8 hnenah Governor's Silver Medal hlan a ni bawk.

Khawpui fai intihsiakna-ah Phullen chu khaw fai berah thlan a ni a, Tlabung-in dawtin, Biате in pathumna an la. District Headquarters-ah pakhatna Saitual District niin, Siaha leh Serchhip District in an dawt a ni.



REPUBLIC DAY

Nimin khan ram pumah Republic Day vawi 76-na, ropui taka lawm a ni a, a lawmna pui ber, New Delhi-a Kartavya Path-a neihah President Droupadi Murmu-in hnam puanzar pawt pharhin parade contingent-te chibai a chhang let a ni.

Delhi-a Republic Day lawmnaah hian Indonesia President, Prabowo Subianto chu khuallian a ni a, parade-ah hian Indonesia atangin member 190 awmna band contingent pawh an tel ve a ni. Swarnim Bharat : Virasat aur Vikas tih thupui hmangin state, union territory leh sorkar laipui hnuai ministry leh department hrang hrang 31-in tableaux an entir a, Indian Airforce indo thlawhna chi hrang hrang an thlawk kual bawk.

Kumin Republic Day lawmnaah hian ramchhung hmun hrang hrang atangin sawm bik mi sing 1 an tel a, heng zingah hian thingtlang khaw hruaitu Sarpanch te, kut themthiamte, SHG member-te, ASHA leh Anganwadi worker-te leh kawngpui siam hna thawktute an tel a ni.



VC, LC CANDIDATES

Thla thar February ni 12 a village council (VC) inthlan lo awm tur atana hming pe lut mi 6,942 te hming pek luh chu endik hnu-ah pawm a ni.

State election commission (SEC) hotute sawi dan chuan VC bakah Aizawl Municipal Corporation (AMC) leh Lunglei Municipal Council (LMC) inthlan lo awm tur chuh tumte hming pek luh hi Zirtawpni khan VC leh LC inthlanna tur khua leh veng tina returning officer-te'n an endik a. Mizoram district 9-a VC 544 a bial 2,416 chuh tura hming pelut zinga hming pek luh 6,942 chu pawm a ni a. VC 544 a bial 2,416 hi a vaiin chuhtu 6,942 an awm a. Hetih lai hian duh duhina chuh theih bial 1,803 chuh tura hming pelut, an nomination endik hnu a pawm chu mi 5,267 an ni a, hmeichhe tana hauh bik bial 613 chuh tu tur mi 1,675 an awm bawk a ni.

AMC huam chhungah local council (LC) bial 575 a awm a, LC inthlan chuhtu zawng zawng hi 1,664 an ni. Bial hauh bik awm lo 418 awmin he'ng bial chuhtu hi mi 1,215 an awm a. Hmeichhe tana hauh bik bial 157 chuh turin mi 449 an awm bawk. LMC huam chhungah bial 148 a awm a, he'ng zinga duh duhin an chuh theih bial 116 hi candidate 312-in an chuh a, hmeichhe puala dah bial 38 chuhtu mi 108 an awm bawk a ni.

Vawiin chawhnu dar 3 thleng khi chuh tuma hming pete tana inhnudawh hun a ni a. Hemi hnu-a inhnukdawk lote chu inthlan chuhtu tak taka ngaih an ni ang. Vawiin tlai lamah vek hian inthlanna a an chhinchhiahna (symbol) hman tur tihfelsak an ni ang a, inthlan chuhtute hming tar chhuah nghal a ni bawk ang.

Hetih lai hian Lawipu LC a ZPM candidate Pu Ismael Jongte (60) chu Inrinni zing khan a thi a. A aiawhtu tur hi Inrinni khan tihfel leh nghal a nih thu SEC thuneitute chuan an sawi a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.



ASF FREE

Kuminah African Swine Fever (ASF) vawk pulhri puang avangin vawk thi leh suat a la awm lo.

Vety department hotute'n an sawi danin kumin kum bul January ni 1 atanga nimin thleng, ni 26 chung khan ASF vawk pulhri avanga vawk thi leh vawk damlo suat a la awm lo a. ASF vawk pulhri hi a reh rih niin an sawi.

Mizoram hi ASF vawk pulhri hian kum 2021 bul lam atang khan a chen chilh tawh a, kumtin a puang ta ziah a. Kum 2021 March ni 21 a Lunglei district a Lungsen khua a ASF vawk pulhri a leng tih hmuhchhuah a nih atanga nikum kum tawp lam thleng khan Mizoramah vawk nuai 1, sing 1, sang 1 leh 434 thi leh suat a awm tawh a. Vawk thi zawng zawng hi 62,761 a ni a, vawk 49,267 suat a ni tawh bawk.

<><><>

USAID

United States Agency for International Development (USAID) chuan Bangladesh-a chhawmdawlina a pek zawng zawng a titawp.

Nimin khan Bangladesh-a an thawhpui zawng zawngte hnenah lehkha thawnin US donor agency USAID chuan Bangladesh-a contract, hnathawh tura thupek siamtawhte, tanpuina sum an pek nate, thawhdunna tur inremna awmsate leh thildang zawng zawng chu titawp turin a ti a.

President Donald Trump-a hnuai ramdang chhawmdawlina an pek thin dan ennawn anih hnuah USAID chuan he thutlukna hi a siam a ni.

<><><>

AO

Nizana Australian Open mipa final-ah World Number 1 Jannik Sinner a champion. Mipa final-ah hian Italy mi Sinner-a hian Rod Laver Arena-ah Alexander Zverev chu 6-3,7-6,6-3 in a hneh a ni.

Kum 23-a upa Sinner-a hi Australian Open-a vawikhat aia tam champion thei naupang ber a ni a. Tun tum ami hi Grand Slam title a lak vawi thumna a ni.

Hetihlai hian Women's doubles final-ah top seed Taylor Townsend leh Katerina Sinakova te an champion a ni.

<><><>